

XEFATURA DO ESTADO

14405 *LEI 26/2003, do 17 de xullo, pola que se modifican a Lei 24/1988, do 28 de xullo, do mercado de valores, e o texto refundido da Lei de sociedades anónimas, aprobado polo Real decreto lexislativo 1564/1989, do 22 de decembro, co fin de reforza-la transparencia das sociedades anónimas cotizadas.* («BOE» 171, do 18-7-2003.)

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei.

EXPOSICIÓN DE MOTIVOS

No ámbito da Unión Europea, a Comisión Europea está elaborando un Plan de acción sobre dereito de sociedades partindo do informe sobre a modernización do dereito de sociedades comunitario do Grupo Winter, presentado en novembro de 2002, e que aborda, en resposta a un mandato do Consello de Ministros de Economía e Finanzas (ECOFIN) de Oviedo, aspectos relevantes da reforma do goberno das empresas suscitados polos acontecementos recentes. Os estados membros adoptaron medidas lexislativas en distintos ámbitos para tratar de lles infundir confianza ós mercados, e promoveron informes para elaborar códigos de bo goberno ou reforma-los xa existentes. Así, en Alemaña aprobouse o pasado ano o informe Cromme; Francia e Italia revisaron os seus códigos, e a principios deste ano os informes Higgs e Smith propuxeron un conxunto de modificacións no código británico baseado no informe Cadbury de 1992.

España non permaneceu á marxe, antes ó contrario, na Lei 44/2002, do 22 de novembro, de medidas de reforma do sistema financeiro, regulouse un comité de auditoría para as sociedades emisoras de valores as accións ou obrigas das cales estean admitidas a negociación en mercados de valores (artigo 47); reforzáronse os mecanismos para a efectiva independencia dos auditores (artigo 51), e adaptouse a Lei do mercado de valores á directiva «Market Abuse», establecendo un réxime esixente en materia de comunicación da información relevante ó mercado (artigos 37 e seguintes).

Do mesmo xeito, tendo en conta o novo marco económico globalizado, en particular a interrelación entre os mercados financeiros, o aumento do grao de internacionalización da economía española, os niveis de harmonización derivados do mercado único europeo, a nova situación estrutural e algunhas disfuncións recentemente postas de manifesto noutros mercados estranxeiros, considerouse a necesidade de promover unha detida reflexión sobre a incidencia destes factores nos mercados financeiros.

Por estas razóns, a proposición non de lei aprobada polo Pleno do Congreso dos Deputados na sesión que tivo lugar o 16 de abril de 2002 promoveu a creación dunha comisión especial de expertos coa tarefa de analiza-la problemática que as anteriores circunstancias provocaron nas sociedades emisoras de valores e instrumentos financeiros admitidos a negociación nos mercados organizados, as relacións entre estas e os consultores, analistas financeiros e as demais empresas e persoas que lles prestan os seus servizos profesionais no ámbito da actividade financeira, así como as relacións

delas entre si, todo iso para incrementa-lo grao de transparencia das sociedades cotizadas e dotar dunha maior estabilidade e seguridade a posición do accionista. Así mesmo, instábase da comisión especial que analizase o estado actual de vixencia e grao de asunción do código de bo goberno en relación coas sociedades cotizadas.

Así, en virtude do anterior, por Acordo do Consello de Ministros do 19 xullo de 2002, creouse a Comisión Especial para o Fomento da Transparencia e Seguridade nos Mercados e Sociedades Cotizadas, co encargo de elaborar un informe, feito público o 8 de xaneiro de 2003, que representou un novo paso adiante no camiño xa seguido pola anteriormente constituída Comisión Especial para o Estudo dun Código Ético dos Consellos de Administración das Sociedades, todo iso dentro do proceso iniciado. A comisión considerou fundamental o principio da transparencia para o correcto funcionamento dos mercados financeiros, o que implica que se transmita ó mercado toda a información relevante para os investidores, que a información que se transmita sexa correcta e veraz, e que esta se transmita de xeito simétrico e equitativo e en tempo útil. A Comisión sinalou que as obrigas de transparencia son unha peza complementaria da autorregulación que igualmente recomenda, o que en última instancia permite deixar moitas cuestións ó ámbito da autonomía privada. Por iso, o informe pon de manifesto nas súas conclusións, sen prexuízo de que o conxunto de medidas propostas se sitúen como recomendacións dirixidas ante todo ás propias empresas, no ámbito da autorregulación, a conveniencia dun soporte normativo no ámbito do fomento da transparencia, con mandatos, o cumprimento dos cales non dependa só da libre e voluntaria determinación das propias empresas destinatarias, as sociedades cotizadas.

Sobre a base do informe sinalado, por tanto, recóllese aquelas recomendacións das cales o máis adecuado soporte se encontra nunha regulación normativa, como son as que se refiren:

- a) Ós deberes de información e transparencia.
- b) Á definición e réxime dos deberes dos administradores, especialmente no ámbito do conflito de intereses.
- c) Á obriga de se dotar dun conxunto de mecanismos en materia de goberno corporativo que comprendan, entre outros, un regulamento do consello de administración, así como da xunta xeral.

Trátase por iso de formular iniciativas normativas sobre a base do fomento da transparencia na xestión das empresas, con respecto ó xa citado principio de autorregulación.

Esta disposición supón darlles soporte normativo, con rango legal, ós aspectos a que se fixo referencia.

A reforma normativa que se presenta concrétese, por unha parte, na modificación de certos preceptos do texto refundido da Lei de sociedades anónimas, aprobado polo Real decreto lexislativo 1564/1989, do 22 de decembro, cando os preceptos teñan aplicación xeral para tódalas sociedades anónimas e, por outra, na introducción dun novo título na Lei 24/1998, do 28 de xullo, do mercado de valores, dedicado ás sociedades cotizadas.

Finalmente, é de sinalar que, como consecuencia das obrigas que se lles impoñen ás sociedades cotizadas en materia de información corporativa e a súa publicidade, tipifícase expresamente como infracción o seu incumprimento, e iso sen prexuízo de que o control no

cumprimento e aplicación polas sociedades cotizadas das medidas que como normas legais se introducen con esta proposta normativa lle corresponderá á Comisión Nacional do Mercado de Valores, de conformidade coas competencias que ten atribuídas pola Lei do mercado de valores, de forma que os incumprimentos ou contravención daquelas seguirán o réxime sancionador previsto de acordo coa tipificación de infraccións e sancións que establece así mesmo a referida Lei do mercado de valores.

Artigo primeiro. *Modificación da Lei 24/1988, do 28 de xullo, do mercado de valores.*

Un. Engádesse un título X, baixo a rúbrica «Das sociedades cotizadas», á Lei 24/1988, do 28 de xullo, do mercado de valores, co seguinte texto:

«TÍTULO X

Das sociedades cotizadas

CAPÍTULO I

Disposicións xerais

Artigo 111. *Ámbito de aplicación.*

1. O disposto neste título será de aplicación ás sociedades anónimas as accións das cales estean admitidas a negociación nun mercado oficial de valores, sen prexuízo do disposto no punto 4 do artigo 112.

2. As sociedades a que se refire o punto anterior rexeranse, en todas aquelas cuestións non previstas neste título, polas disposicións aplicables ás sociedades anónimas, á parte das demais normas que lles sexan de aplicación.

CAPÍTULO II

Dos pactos parasociais suxeitos a publicidade

Artigo 112. *Publicidade dos pactos parasociais e doutros pactos que afecten unha sociedade cotizada.*

1. Para os efectos do disposto neste título, enténdense por pactos parasociais aqueles pactos que inclúan a regulación do exercicio do dereito de voto nas xuntas xerais ou que restrinxan ou condicionen a libre transmisibilidade das accións nas sociedades anónimas cotizadas. O disposto neste artigo respecto dos pactos parasociais aplicarase tamén ós supostos de pactos que co mesmo obxecto se refiran a obrigas convertibles ou canxeables emitidas por unha sociedade anónima cotizada.

2. A realización, prórroga ou modificación dun pacto parasocial que teña por obxecto o exercicio do dereito de voto nas xuntas xerais ou que restrinxa ou condicione a libre transmisibilidade das accións ou de obrigas convertibles ou canxeables nas sociedades anónimas cotizadas haberá de ser comunicada con carácter inmediato á propia sociedade e á Comisión Nacional do Mercado de Valores, acompañando copia das cláusulas do documento no que conste, que afecten o dereito de voto ou que restrinxa ou condicionen a libre transmisibilidade das accións ou das obrigas convertibles ou canxeables. Una vez efectuadas estas comunicacións, o documento no que conste o pacto parasocial deberá ser depositado no rexistro mercantil no que a sociedade estea inscrita.

O pacto parasocial deberá publicarse como feito relevante.

En tanto non teñan lugar as comunicacións, o depósito e a publicación como feito relevante, o pacto parasocial non producirá efecto ningún en canto ás referidas materias, sen prexuízo da restante normativa aplicable.

3. Calquera dos asinantes do pacto parasocial estará lexitimado para realiza-las comunicacións e o depósito ós que se refire o punto anterior, incluso aínda que o propio pacto prevexa a súa realización por algún deles ou por un terceiro. En casos de usufructo e peñor de accións, a lexitimación corresponderalle a quen teña o dereito de voto.

4. O disposto nos puntos anteriores será de aplicación ós pactos parasociais entre socios ou membros dunha entidade que exerza o control sobre unha sociedade cotizada.

5. Por solicitude dos interesados, cando a publicidade poida ocasionar un grave dano á sociedade, a Comisión Nacional do Mercado de Valores poderá acordar, motivando a súa resolución, que non se lle dea publicidade ningunha a un pacto parasocial que lle fose comunicado, ou a parte del, e dispensar da comunicación do dito pacto a propia sociedade, do depósito no rexistro mercantil do documento en que conste e da publicación como feito relevante, determinando o tempo en que pode manterse en segredo entre os interesados.

CAPÍTULO III

Dos órganos sociais

Artigo 113. *Da xunta xeral de accionistas.*

1. A xunta xeral de accionistas da sociedade anónima con accións admitidas a negociación nun mercado oficial de valores, constituída co quórum do artigo 102 da Lei de sociedades anónimas ou o superior previsto a este propósito nos estatutos, aprobará un regulamento específico para a xunta xeral. No dito regulamento poderanse ter en conta todas aquelas materias que afectan a xunta xeral, con respecto das materias reguladas na lei e os estatutos.

2. O dito regulamento será obxecto de comunicación á Comisión Nacional do Mercado de Valores, xuntando copia do documento en que conste. Unha vez efectuada esta comunicación inscribirase no Rexistro Mercantil de acordo coas normas xerais.

Artigo 114. *Deberes dos administradores.*

1. No caso de que os administradores dunha sociedade anónima cotizada, ou outra persoa, formulasen solicitude pública de representación, o administrador que a obteña non poderá exercer-lo dereito de voto correspondente ás accións representadas naqueles puntos da orde do día nos que se encontre en conflito de intereses e, en todo caso, respecto das seguintes decisións:

- a) O seu nomeamento ou ratificación como administrador.
- b) A súa destitución, separación ou cesamento como administrador.
- c) O exercicio da acción social de responsabilidade dirixida contra el.
- d) A aprobación ou ratificación, cando proceda, de operacións da sociedade co administrador de que se trate, sociedades controladas por el ou ás que represente ou persoas que actúen pola súa conta.

A delegación poderá tamén incluír aqueles puntos que, aínda non previstos na orde do día da

convocatoria, sexan tratados, por así permitilo a lei, na xunta, aplicándose tamén nestes casos o previsto no parágrafo anterior.

2. Sen prexuízo do establecido no artigo 35 desta lei, na memoria da sociedade deberase informar sobre as operacións dos administradores, ou persoa que actúe por conta destes, realizadas, durante o exercicio social ó que se refiran as contas anuais, coa citada sociedade cotizada ou cunha sociedade do mesmo grupo, cando as operacións sexan alleas ó tráfico ordinario da sociedade ou que non se realicen en condicións normais de mercado.

3. Sen prexuízo do disposto no título VII desta lei, os administradores deberanse abster de realizar, ou de suxerir-la súa realización a calquera persoa, unha operación sobre valores da propia sociedade ou das sociedades filiais, asociadas ou vinculadas sobre as que dispoña, por razón do seu cargo, de información privilexiada ou reservada, en tanto esa información no se dea a coñecer publicamente.

Artigo 115. Do consello de administración.

1. Nas sociedades anónimas cotizadas o consello de administración, con informe á xunta xeral, dictará un regulamento de normas de réxime interno e funcionamento do propio consello, de acordo coa lei e os estatutos, que conterà as medidas concretas tendentes a garanti-la mellor administración da sociedade.

2. O dito regulamento será obxecto de comunicación á Comisión Nacional do Mercado de Valores, xuntando copia do documento en que conste. Unha vez efectuada esta comunicación inscribírase no Rexistro Mercantil de acordo coas normas xerais.

CAPÍTULO IV

Da información societaria

Artigo 116. Do informe anual de goberno corporativo.

1. As sociedades anónimas cotizadas deberán facer público con carácter anual un informe de goberno corporativo.

2. O informe anual de goberno corporativo será obxecto de comunicación á Comisión Nacional do Mercado de Valores, xuntando copia do documento en que conste. A Comisión Nacional do Mercado de Valores remitirá copia do informe comunicado ás respectivas autoridades de supervisión cando se trate de sociedades cotizadas que estean dentro do seu ámbito de competencias.

3. O informe será obxecto de publicación como feito relevante.

4. O contido e estrutura do informe de goberno corporativo será determinado polo Ministerio de Economía ou, coa súa habilitación expresa, pola Comisión Nacional do Mercado de Valores. O dito informe deberá ofrecer unha explicación detallada da estrutura do sistema de goberno da sociedade e do seu funcionamento na práctica. En todo caso, o contido mínimo do informe de goberno corporativo será o seguinte:

a) Estructura de propiedade da sociedade, con información relativa ós accionistas con participacións significativas, indicando as porcentaxes de participación e as relacións de índole familiar, comercial, contractual ou societaria que exista, así como a súa representación no consello; das participacións accionarias dos membros do consello de administración que deberán comunicar á sociedade, e da existencia dos pactos parasociais comu-

nicados á propia sociedade e á Comisión Nacional do Mercado de Valores, e, se é o caso, depositados no Rexistro Mercantil. Igualmente, informarase da autocartera da sociedade e das súas variacións significativas.

b) Estructura da administración da sociedade, con información relativa á composición, regras de organización e funcionamento do consello de administración e das súas comisións; identidade e remuneración dos seus membros, funcións e cargos dentro da sociedade, as súas relacións con accionistas con participacións significativas, indicando a existencia de conselleiros cruzados ou vinculados e os procedementos de selección, remoción ou reelección.

c) Operacións vinculadas da sociedade cos seus accionistas e os seus administradores e cargos directivos e operacións intragrupo.

d) Sistemas de control do risco.

e) Funcionamento da xunta xeral, con información relativa ó desenvolvemento das reunións que teñan lugar.

f) Grao de seguimento das recomendacións de goberno corporativo, ou, se é o caso, a explicación da falta de seguimento das ditas recomendacións.

5. Sen prexuízo das sancións que proceda impor pola falta de remisión da documentación ou do informe de goberno corporativo, ou pola existencia de omisións ou datos enganosos ou erróneos, correspóndelle á Comisión Nacional do Mercado de Valores o seguimento das regras de goberno corporativo, para o efecto das cales poderá solicitar tanta información precise ó respecto, así como facer pública a información que considere relevante sobre o seu grao efectivo de cumprimento.

Artigo 117. Dos instrumentos de información.

1. As sociedades anónimas cotizadas deberán cumprirlas obrigas de información ás que as somete a Lei de sociedades anónimas por calquera medio técnico, informático ou telemático, sen prexuízo dos dereitos que lles corresponden ós accionistas, de acordo coa lexislación aplicable, para solicita-la información en forma impresa.

2. As sociedades anónimas cotizadas deberán dispor dunha páxina web para atende-lo exercicio, por parte dos accionistas, do dereito de información, e para difundir-la información relevante, de acordo co disposto no artigo 82.5 desta lei.

3. Correspóndelle ó consello de administración establece-lo contido da información que se vai facilitar, de conformidade co que estableza o Ministerio de Economía ou, coa súa habilitación expresa, a Comisión Nacional do Mercado de Valores.

4. Así mesmo, facúltase o ministro de Economía e, coa súa habilitación expresa, á Comisión Nacional do Mercado de Valores, para desenvolver-las especificacións técnicas e xurídicas necesarias respecto do establecido neste artigo.»

Dous. Engádense os parágrafos a) bis, b) bis e m) bis ó artigo 100 da Lei 24/1988, do 28 de xullo, do mercado de valores, así como un inciso no último parágrafo do dito artigo, coa seguinte redacción:

«a) bis. A falta de comunicación, depósito ou publicación como feito relevante a que se refire o punto 2 do artigo 112 desta lei.»

«b) bis. A falta de elaboración ou de publicación do informe anual de goberno corporativo a que se refire o artigo 116 desta lei, ou a existencia no dito informe de omisións ou datos falsos ou enganosos.»

«m) bis. A inexistencia da páxina web prevista no punto 2 do artigo 117 e no punto 5 do artigo 82, ou a falta da información sinalada nos ditos artigos ou nas súas normas de desenvolvemento.»

...

«Cando as infraccións consideradas nos parágrafos c), g) e h) do punto anterior se produzan con referencia ós grupos consolidables de empresas de servizos de investimento, ou ós grupos consolidables dos que sexan dominantes as entidades ás que se refiren os parágrafos a) e b) do número 1 do artigo 84, considerarase responsable a entidade obrigada a formular e aproba-las contas e o informe de xestión consolidados. A infracción contemplada no parágrafo a) bis imporase solidariamente a calquera dos partícipes no pacto parasocial.»

Artigo segundo. *Modificación do texto refundido da Lei de sociedades anónimas, aprobado por Real decreto legislativo 1564/1989, do 22 de decembro.*

Introdúcense as seguintes modificacións no texto refundido da Lei de sociedades anónimas, aprobado por Real decreto legislativo 1564/1989, do 22 de decembro.

Un. Engádense dous novos puntos, 4 e 5, ó artigo 105, coa seguinte redacción:

«4. De conformidade co que se dispoña nos estatutos, o voto das propostas sobre puntos comprendidos na orde do día de calquera clase de xunta xeral poderá ser delegado ou exercido polo accionista mediante correspondencia postal, electrónica ou calquera outro medio de comunicación a distancia, sempre que se garanta debidamente a identidade do suxeito que exerce o seu dereito de voto.

5. Os accionistas que emitan os seus votos a distancia deberán ser tidos en conta para efectos de constitución da xunta como presentes.»

Dous. Dáselle unha nova redacción ó punto 2 do artigo 106, que pasa a te-lo seguinte teor:

«2. A representación deberase conferir por escrito ou por medios de comunicación a distancia que cumbran cos requisitos previstos no artigo anterior para o exercicio do dereito de voto a distancia, e con carácter especial para cada xunta.»

Tres. Dáselle unha nova redacción ó artigo 112, que pasa a ser:

«Artigo 112. Dereito de información.

1. Ata o sétimo día anterior ó previsto para a celebración da xunta, os accionistas poderán solicitar dos administradores, respecto dos asuntos comprendidos na orde do día, as informacións ou aclaracións que estimen precisas, ou formular por escrito as preguntas que estimen pertinentes. Os accionistas dunha sociedade anónima cotizada poderán solicitar informacións ou aclaracións ou formular preguntas por escrito respecto da información accesible ó público que fose facilitada pola sociedade á Comisión Nacional do Mercado de Valores desde a celebración da última xunta xeral.

Os administradores estarán obrigados a facilitar a información por escrito ata o día da celebración da xunta xeral.

2. Durante a celebración da xunta xeral, os accionistas da sociedade poderán solicitar verbalmente as informacións ou aclaracións que consideren convenientes respecto dos asuntos comprendidos na orde do día e, en caso de non ser posible satisfácelo dereito do accionista nese momento,

os administradores estarán obrigados a facilitar esa información por escrito dentro dos sete días seguintes ó da terminación da xunta.

3. Os administradores estarán obrigados a proporcionar a información solicitada ó abeiro dos dous puntos anteriores, salvo nos casos en que, a xuízo do presidente, a publicidade da información solicitada prexudique os intereses sociais.

4. Non procederá a denegación de información cando a solicitude estea apoiada por accionistas que representen, alomenos, a cuarta parte do capital social.»

Catro. Modifícase o artigo 127, que pasa a te-la seguinte redacción:

«Artigo 127. Deber de diligente administración.

1. Os administradores desempeñarán o seu cargo coa dilixencia dun ordenado empresario e dun representante leal.

2. Cada un dos administradores deberá informarse dilixentemente sobre a marcha da sociedade.»

Cinco. Introdúcense os artigos 127 bis, 127 ter e 127 quáter coa seguinte redacción:

«Artigo 127 bis. Deberes de fidelidade.

Os administradores deberán cumprilos deberes impostos polas leis e polos estatutos con fidelidade ó interese social, entendido como interese da sociedade.

Artigo 127 ter. Deberes de lealdade.

1. Os administradores non poderán utilizarlo nome da sociedade nin invoca-la súa condición de administradores desta para a realización de operacións por conta propia ou de persoas a eles vinculadas.

2. Ningún administrador poderá realizar, en beneficio propio ou de persoas a el vinculadas, investimentos ou calquera operación ligada ós bens da sociedade, das que tivo coñecemento con ocasión do exercicio do cargo, cando o investimento ou a operación fose ofrecido á sociedade ou a sociedade tivese interese nel, sempre que a sociedade non desestimase o dito investimento ou operación sen mediar influencia do administrador.

3. Os administradores deberanlle comunicar ó consello de administración calquera situación de conflito, directo ou indirecto, que puidesen ter, co interese da sociedade. En caso de conflito, o administrador afectado absterase de intervir na operación a que o conflito se refira.

En todo caso, as situacións de conflito de intereses en que se encontren os administradores da sociedade serán obxecto de información no informe anual de goberno corporativo.

4. Os administradores deberán comunica-la participación que tiveran no capital dunha sociedade co mesmo, análogo ou complementario xénero de actividade ó que constituía o obxecto social, así como os cargos ou as funcións que nela exerzan, así como a realización por conta propia ou allea, do mesmo, análogo ou complementario xénero de actividade do que constituía o obxecto social. A dita información incluírase na memoria.

5. Para efectos deste artigo, terán a consideración de persoas vinculadas ós administradores:

1.º O cónxuxe do administrador ou as persoas con análoga relación de afectividade.

2.º Os ascendentes, descendentes e irmáns do administrador ou do cónxuxe do administrador.

3.º Os cónxuxes dos ascendentes, dos descendentes e dos irmáns do administrador.

4.º As sociedades nas que o administrador, por si ou por persoa interposta, se encontre nalgunha das situacións contempladas no artigo 4 da Lei 24/1988, do 28 de xullo, do mercado de valores.

Respecto do administrador persoa xurídica, entenderanse que son persoas vinculadas as seguintes:

1.º Os socios que se encontren, respecto do administrador persoa xurídica, nalgunha das situacións contempladas no artigo 4 da Lei 24/1988, do 28 de xullo, do mercado de valores.

2.º Os administradores, de dereito ou de feito, os liquidadores, e os apoderados con poderes xerais do administrador persoa xurídica.

3.º As sociedades que formen parte do mesmo grupo, tal e como este se define no artigo 4 da Lei 24/1988, do 28 de xullo, do mercado de valores, e os seus socios.

4.º As persoas que respecto do representante do administrador persoa xurídica teñan a consideración de persoas vinculadas ós administradores, de conformidade co que se establece no parágrafo anterior.

Artigo 127 quáter. *Deber de segredo.*

1. Os administradores, aínda despois de cesaren nas súas funcións, deberán gardar segredo das informacións de carácter confidencial, e estarán obrigados a gardar reserva das informacións, datos, informes ou antecedentes que coñezan como consecuencia do exercicio do cargo, sen que estas poidan ser comunicadas a terceiros ou ser obxecto de divulgación cando puidese ter consecuencias prexudiciais para o interese social.

Exceptúanse do deber a que se refire o parágrafo anterior os supostos en que as leis permitan a súa comunicación ou divulgación a terceiro ou que, se é o caso, sexan requiridos ou teñan que remitir ás respectivas autoridades de supervisión, caso este no que a cesión de información se deberá axustar ó disposto polas leis.

2. Cando o administrador sexa persoa xurídica, o deber de segredo recaerá sobre o representante desta, sen prexuízo do cumprimento da obriga que teñan de informar a aquela.»

Seis. Dáselle unha nova redacción ó artigo 133, que pasa a ser:

«Artigo 133. *Responsabilidade.*

1. Os administradores responderán fronte á sociedade, fronte ós accionistas e fronte ós acredores sociais do dano que causen por actos ou omisións contrarios á lei ou ós estatutos ou polos realizados incumprindo os deberes inherentes ó desempeño do cargo.

2. O que actúe como administrador de feito da sociedade responderá persoalmente fronte á sociedade, fronte ós accionistas e fronte ós acredores do dano que cause por actos contrarios á lei ou ós estatutos ou polos realizados incumprindo os deberes que esta lei impón a quen formalmente desempeña de acordo con esta a condición de administrador.

3. Responderán solidariamente tódolos membros do órgano de administración que realizou o acto ou adoptou o acordo lesivo, menos os que proben que, non tendo intervido na súa adopción e execución, descoñecían a súa existencia ou, coñecendoa, fixeron todo o conveniente para evita-

dano ou, alomenos, se opuxeron expresamente a aquel.

4. En ningún caso exonerará de responsabilidade a circunstancia de que o acto ou acordo lesivo fose adoptado, autorizado ou ratificado pola xunta xeral.»

Disposición adicional primeira. *Comunicación á Dirección Xeral de Seguros e Fondos de Pensións e Banco de España.*

A comunicación á que se refire o artigo 112.2 da Lei 24/1988, do 28 de xullo, do mercado de valores, efectuarase tamén ós organismos supervisores competentes cando a sociedade anónima cotizada sexa entidade aseguradora, entidade xestora de fondos de pensións ou entidade de crédito.

Disposición adicional segunda.

1. As caixas de aforro que emitan valores admitidos a negociación en mercados oficiais de valores deberán facer público con carácter anual un informe de goberno corporativo. O informe anual de goberno corporativo será obxecto de comunicación á Comisión Nacional do Mercado de Valores, xuntando copia do documento en que conste. A Comisión Nacional do Mercado de Valores remitirá copia do informe comunicado ó Banco de España e ós órganos competentes das comunidades autónomas.

O informe será obxecto de publicación como feito relevante e incluírase na páxina web da citada entidade.

2. O contido e estrutura do informe anual de goberno corporativo das caixas de aforro, tendo en conta a natureza xurídica das ditas entidades, deberá ofrecer unha explicación detallada da estrutura do sistema de goberno da entidade e do seu funcionamento na práctica.

En todo caso, o contido mínimo do informe de goberno corporativo será o seguinte:

a) Estructura de administración da entidade, con información das remuneracións percibidas polo consello de administración, a comisión de control, a comisión de retribucións e a comisión de investimentos, computando tanto as axudas de custo por asistencia ós citados órganos como os soldos que se perciban polo desempeño das súas funcións, así como as remuneracións análogas ás anteriores e as obrigas contraídas en materia de pensións ou de pagamento de primas de seguros de vida. Tamén se incluírán toda clase de remuneracións percibidas polos membros dos órganos de goberno e persoal directivo, derivadas da participación en representación das caixas de aforro en sociedades cotizadas ou noutras entidades nas que a caixa teña unha presenza ou representación significativa, en representación da caixa de aforros.

b) Operacións efectuadas, xa sexa directamente ou a través de entidades dotadas, adscritas ou participadas, con descrición das súas condicións, incluídas as financeiras, cos membros do consello de administración e da comisión de control das caixas de aforro e familiares en primeiro grao e con empresas ou entidades en relación coas que os anteriores se encontren nalgunha das situacións previstas no artigo 4 da Lei 24/1988, do 28 de xullo, do mercado de valores.

c) Operacións efectuadas, xa sexa directamente ou a través de entidades dotadas, adscritas ou participadas, con descrición das súas condicións, incluídas as financeiras, cos grupos políticos que teñan representación nas corporacións locais e nas asembleas parlamentarias autonómicas, que participasen no proceso electoral. Ademais, deberase explicitar en caso de crédito a situación deste.

d) Operacións crediticias con institucións públicas que participasen no proceso electoral da caixa.

e) Remuneracións percibidas pola prestación de servizos á caixa ou ás entidades controladas por esta dos membros do consello de administración e da comisión de control das caixas de aforro e do persoal directivo.

f) Estructura de negocio e das relacións dentro do seu grupo económico, con referencia ás operacións vinculadas da entidade cos membros do consello de administración, comisión de control, comisión de retribucións e comisión de investimento e persoal directivo e operacións intragrupo.

g) Sistemas de control de risco.

h) Funcionamento de órganos de goberno, con explicación detallada do sistema de goberno e administración da entidade, en especial en relación coa toma de participacións empresariais, ben directamente, ben por entidades dotadas, adscritas ou participadas.

Facúltase o Ministerio de Economía para determinar, con observancia do mínimo establecido no parágrafo anterior, o contido e estrutura do informe anual de goberno corporativo das caixas de aforro, e, coa súa habilitación expresa, á Comisión Nacional do Mercado de Valores no caso de que se trate de caixas de aforro que emitan valores admitidos a negociación en mercados oficiais de valores.

3. Sen prexuízo das sancións que proceda impor pola falta de remisión da documentación ou dos informes que deban remitir, correspóndelle á Comisión Nacional do Mercado de Valores, no ámbito das súas competencias, o seguimento das regras de goberno corporativo das caixas de aforro que emitan valores admitidos a negociación en mercados oficiais de valores, para este efecto poderán solicitar tanta información precise ó respecto, así como facer pública a información que considere relevante sobre o grao efectivo de cumprimento das regras de goberno corporativo da entidade.

4. A falta de elaboración ou de publicación do informe anual de goberno corporativo das caixas de aforro a que se refire o punto 1 da presente disposición, ou a existencia no dito informe de omisións ou datos falsos ou enganosos, terá a consideración de infracción grave para os efectos previstos no artigo 100.b) bis da Lei 24/1988, do 28 de xullo, do mercado de valores.

Disposición adicional terceira.

Sen prexuízo do establecido nesta lei sobre o informe anual de goberno corporativo das caixas de aforro, o disposto no artigo 116 da Lei 24/1988, do 28 de xullo, do mercado de valores, será tamén de aplicación, de acordo coa súa natureza xurídica, ás restantes entidades que emitan valores que se negocien en mercados oficiais de valores.

Facúltase o Ministerio de Economía e, coa súa habilitación expresa, a Comisión Nacional do Mercado de Valores para establecer, tendo en conta a natureza xurídica das diferentes categorías de entidades ás que resulte de aplicación esta disposición, medidas concretas sobre o contido e estrutura do informe de goberno corporativo.

Disposición adicional cuarta. *Modificación da Lei 31/1985, do 2 de agosto, de regulación das normas básicas sobre órganos rectores das caixas de aforro.*

Un. Introdúcese un artigo 20 bis coa seguinte redacción:

«O consello de administración das caixas de aforro constituirá no seu seo unha comisión de retribucións, que terá a función de informar sobre a

política xeral de retribucións e incentivos para os cargos do consello e para o persoal directivo. A comisión estará formada por tres membros, salvo que a normativa de desenvolvemento estableza outro número, que serán designados polo consello de administración seguindo as proporcións deste. O réxime de funcionamento da comisión de retribucións será establecido pola normativa de desenvolvemento.»

Dous. Introdúcese un novo artigo 20 ter, que queda redactado como segue:

«O consello de administración das caixas de aforro constituirá no seu seo unha comisión de investimentos, formada por tres membros, salvo que a normativa de desenvolvemento estableza outro número, que terá a función de propor e informalo consello sobre os investimentos e desinvestimentos de carácter estratéxico e estable que efectúe a caixa, xa sexa directamente ou a través das súas entidades dotadas, adscritas ou participadas, así como sobre a viabilidade financeira dos citados investimentos e sobre a súa adecuación ós obxectivos fundacionais da entidade. Os membros da comisión serán designados polo consello de administración seguindo as proporcións deste. A comisión de investimentos remitiralle anualmente ó consello de administración un informe no que, alomenos, se deberá incluír un resumo dos ditos investimentos, así como sobre a súa viabilidade financeira e sobre a adecuación destes ós obxectivos fundacionais da entidade. Igualmente incluírase no informe anual relación e sentido dos informes emitidos pola citada comisión.

En todo caso, entenderase como estratéxica a adquisición ou venda de calquera participación significativa de calquera sociedade cotizada ou a participación en proxectos empresariais con presenza na xestión ou nos seus órganos de goberno.

O réxime de funcionamento da comisión de investimentos será establecido pola normativa de desenvolvemento.»

Disposición adicional quinta.

Con efectos para os períodos impositivos iniciados a partir do 1 de xaneiro de 2002, modifícase o punto 3 do artigo 142 da Lei 43/1995, do 27 de decembro, do imposto sobre sociedades, que queda redactado nos seguintes termos:

«3. Os suxeitos pasivos a que se refire o capítulo XV do título VIII desta lei estarán obrigados a declara-la totalidade das súas rendas, exentas e non exentas.

Non obstante, os citados suxeitos pasivos non terán obriga de presentar declaración cando cumpran os seguintes requisitos:

a) Que os seus ingresos totais non superen 100.000 euros anuais.

b) Que os ingresos correspondentes a rendas non exentas sometidas a retención non superen 2.000 euros anuais.

c) Que tódalas rendas non exentas que obteñan estean sometidas a retención.»

Disposición transitoria primeira. *Adaptación dos aspectos organizativos e estatutarios.*

Nos aspectos organizativos e estatutarios as sociedades anónimas cotizadas deberán adaptarse ás previsións desta lei no prazo de doce meses desde a súa entrada en vigor.

Disposición transitoria segunda.

O informe de goberno corporativo previsto na disposición adicional segunda desta lei elaborárase por primeira vez en relación ó exercicio económico de 2004.

Disposición transitoria terceira.

1. Os pactos parasociais e outros pactos que afecten unha sociedade cotizada, a que se refire o artigo 112.1 da Lei 24/1988, do mercado de valores, sempre que afecten máis do cinco por cento do capital social da entidade ou dos dereitos de voto e dos cales a celebración, prórroga ou modificación tivese lugar con anterioridade á entrada en vigor desta lei, deberán ser obxecto de comunicación, depósito e publicación, de conformidade co establecido no artigo 112 da Lei 24/1988, do mercado de valores, no prazo máximo de tres anos desde que esta lei entre en vigor, salvo no suposto de que se presente unha oferta pública de adquisición de accións da sociedade cotizada, caso este no cal a comunicación, depósito e publicación dos pactos parasociais deberá realizarse con carácter inmediato á solicitude de autorización á Comisión Nacional do Mercado de Valores.

2. Sen prexuízo do indicado no punto anterior e do disposto na restante normativa aplicable, os pactos ós que se refire o punto 1 anterior serán ineficaces:

a) En todo caso, en canto ás materias a que se refire o artigo 112.1 da Lei 24/1988, do mercado de valores, transcorridos os prazos a que se refire o punto 1 anterior sen que tivese lugar a comunicación, o depósito e a publicación.

b) Do mesmo xeito e sen prexuízo do disposto no parágrafo a), aínda que se produza a comunicación, o depósito e a publicación, nos extremos que sexan contrarios á lei.

c) Así mesmo, desde a entrada en vigor desta lei e aínda que se produza a comunicación, o depósito e a publicación, na parte dos pactos parasociais, incluída neste caso a regulación directa ou indirecta do dereito de voto en calquera órgano social, que fosen celebrados, prorrogados ou modificados con posterioridade á entrada en vigor xeral da Lei 24/1988, do 28 de xullo, do mercado de valores, a que se refire o artigo 112.1 da dita lei, cando as partes por eles vinculadas fosen titulares, directa ou indirectamente e no momento da celebración, prórroga ou modificación, dunha participación que conxuntamente sexa superior ó 25 por cento dos dereitos de voto na sociedade cotizada, sen que aquelas ou algunha delas formulase naquel momento unha oferta pública de adquisición como a que, conforme a normativa entón vixente, debese formular quen pretendese adquirir unha porcentaxe do capital social igual ó que, en conxunto, era titularidade das partes vinculadas polo pacto.

3. Calquera outro pacto que sexa instrumentación dos pactos parasociais ós que se refire o punto 2 anterior será ineficaz nos mesmos casos en que o sexan estes últimos.

Disposición derradeira única. Entrada en vigor.

Esta lei entrará en vigor o día seguinte ó da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumpran e fagan cumprir esta lei.

Madrid, 17 de xullo de 2003.

JUAN CARLOS R.

O presidente do Goberno,
JOSÉ MARÍA AZNAR LÓPEZ

MINISTERIO DE SANIDADE E CONSUMO

14408 REAL DECRETO 865/2003, do 4 de xullo, polo que se establecen os criterios hixiénico-sanitarios para a prevención e control da lexionelose. («BOE» 171, do 18-7-2003.)

A lexionelose é unha enfermidade bacteriana de orixe ambiental que adoita presentar dúas formas clínicas diferenciadas: a infección pulmonar ou «enfermidade do lexionario», que se caracteriza por pneumonía con febre alta, e a forma non pneumónica, coñecida como «Febre de Pontiac», que se manifesta como unha síndrome febril aguda e de pronóstico leve.

A infección por legionella pode ser adquirida en dous ámbitos, o comunitario e o hospitalario. En ámbolos casos a enfermidade pode estar asociada a varios tipos de instalacións, equipos e edificios. Pódese presentar en forma de brotes e casos illados ou esporádicos.

A legionella é unha bacteria ambiental capaz de sobrevivir nun amplo intervalo de condicións físico-químicas, multiplicándose entre 20 °C e 45 °C, destruíndose a 70 °C. A súa temperatura óptima de crecemento é 35-37 °C. O seu nicho ecolóxico natural son as augas superficiais, como lagos, ríos ou estanques, formando parte da súa flora bacteriana. Desde estes reservorios naturais a bacteria pode colonizar os sistemas de abastecemento das cidades e, a través da rede de distribución de auga, incorpórase ós sistemas de auga sanitaria (fría ou quente) ou a outros sistemas que requiren auga para o seu funcionamento como as torres de refrixeración. Nalgunhas ocasións, nestas instalacións, mal deseñadas, sen mantemento ou cun mantemento inadecuado, fávórecese o estancamento da auga e a acumulación de produtos nutrientes da bacteria, como lodos, materia orgánica, materias de corrosión e amebas, formando unha biocapa. A presenza desta biocapa, xunto a unha temperatura propicia, explica a multiplicación de legionella ata concentracións infectantes para o ser humano. Se existe na instalación un mecanismo produtor de aerosois, a bacteria pódese dispersar polo aire. As gotas de auga que conteñen a bacteria poden permanecer suspendidas no aire e penetrar por inhalación no aparello respiratorio.

As instalacións que con maior frecuencia se encontran contaminadas con legionella e foron identificadas como fontes de infección son os sistemas de distribución de auga sanitaria, quente e fría e os equipos de arrefriamento de auga evaporativos, tales como as torres de refrixeración e os condensadores evaporativos, tanto en centros sanitarios como en hoteis ou noutro tipo de edificios.

A Comisión de Saúde Pública do Consello Interterritorial do Sistema Nacional de Saúde, na súa reunión do 29 de outubro de 1999, co obxectivo de evitar ou reducir ó mínimo a aparición de brotes, considerou necesario dispoñer de criterios técnico-sanitarios coordinados e aceptados polas autoridades sanitarias da Administración estatal, autonómica e local. Por iso se aprobou o Real decreto 909/2001, do 27 de xullo, polo que se establecen os criterios hixiénico-sanitarios para a prevención e control da lexionelose.

O avance dos coñecementos científico-técnicos e a experiencia acumulada na aplicación do citado real decreto obrigan á súa derogación e a aprobar unha nova norma que contemple as innovacións necesarias para un maior control da lexionelose. Emporiso, considérase necesario seguir profundando naqueles aspectos